

摛藻堂四庫全書薈要

集部

欽定四庫全書叢要

集部

漢魏六朝百三家集卷二十七

詳校官候選知縣臣吳甸華



欽定四庫全書

漢魏六朝百三家集卷二十七

集部

明 張溥 輯

曹植集

二

樂府

詩品云 植詩源出於國風骨氣奇高詞彩華茂
情兼怨雅體被文質粲溢今古卓爾不羣差乎
陳思之于文章也譬人倫之有周孔鱗羽之有
龍鳳音樂之有琴笙女工之有黼黻俾爾懷鉛
吮墨者挹篇章而景慕映餘輝以自燭故孔氏
之門如有詩則公幹升堂思王入室景陽潘陸

自可坐於廊廡之間矣皓然詩評云鄴中七子
陳王最髙劉郎辭氣偏正得其中不拘對屬偶
或有之語與興駢勢逐情起不由作意氣格自
高十九首其流一也詩譜云斲削精潔自然沉
健竹林詩評云曹子建之作亦正亦變駿駿乎
大雅之製焉蘭莊詩話云子建詩質樸渾厚春
容雋永風調非後人易到陳子昂李太白慕以
為宗信乎晉以下鮮其儼也予每讀其詩灑然
有千古之想無名氏云選中子建詩懇惻慷慨
頗有風人遺意李夢陽序云植其音宛其情危
其言憤切而有餘悲殆處危疑之際者乎藝苑
卮言云子建天才流麗雖譽冠千古而實避父
兄何以故材太高辭太華又書云子建才最於
父兄然不如其父兄質漢樂府之變自子建始

箜篌引

置酒高殿上親友從我遊中厨辦豐膳烹羊宰肥牛秦
箏何慷慨齊瑟和且柔陽阿奏竒舞京洛出名謳樂飲
過三爵緩帶傾庶羞主稱千金壽賓奉萬年酬久要不
可忘薄終義所尤謙謙君子德磬折欲何求驚風飄白
日光景馳西流盛時不可再百年忽我適生存華屋處
零落歸山丘先民誰不死知命復何憂

薤露行

樂府解題云曹植擬薤露行為天地

天地無窮極陰陽轉相因人居一世間忽若風吹塵願

得展功勤輸力於明君懷此王佐才慷慨獨不群鱗介
尊神龍走獸宗麒麟蟲獸猶知德何況於士人孔氏刪
詩書王業粲已分騁我徑寸翰流藻垂華芬

惟漢行

魏武帝薤露詩云惟漢二十世所任誠不良

太極定二儀清濁始以形三光昭八極天道甚著明為
人立君長欲以遂其生行仁章以瑞變故誠騎盈神高
而聽卑報若響應聲明主敬細微三季曹天經二皇稱
至化盛哉唐虞庭禹湯繼厥德周亦致太平在昔懷帝

京日是不敢寧濟濟在公朝萬載馳其名

平陵東

閭閻開天衢通被我羽衣乘飛龍乘飛龍與仙期東上蓬萊採靈芝靈芝採之可服食年若王父終無極若一作與

鯰鮋篇

一曰鯰鮋篇按樂府解題云曹植擬長歌行為鯰鮋

鯰鮋游潢潦不知江海流燕雀戲藩柴安識鴻鵠遊世士此誠明大德固無儔駕言登五嶽然後小陵丘俯觀上路人勢利惟是謀讐高念皇家遠懷柔九州撫効而

雷音猛氣縱橫浮汎泊徒嗷嗷誰知壯士憂

吁嗟篇

選詩拾遺作瑟調飛蓬篇按樂府解題云曹植擬苦寒行為吁嗟魏志云植每

欲求別見獨談及時政幸冀試用終不能得

時法制侍藩國峻泊植十一年而三徙都常

汲汲無歡

吁嗟此轉蓬居世何獨然長去本根逝宿夜無休閒東
西經七陌南北越九阡卒遇回風起吹我入雲間自謂
終天路忽然下沈泉驚飈接我出故歸彼中田當南而
更北謂東而反西宕宕當何依忽亡而復存飄颻周八

澤連翩歷五山流轉無恒處誰知吾苦艱願為中林草

秋隨野火燔糜滅豈不痛願與根荄連

泉一作淵根一作株

豫章行二首

樂府解題云曹植擬豫章行為窮達

窮達難豫圖禍福信亦然虞舜不逢堯耕耘處中田太公未遭文漁釣終渭川不見魯孔丘窮困陳蔡間周公

下白屋天下稱其賢

終一作經

其二

鴛鴦自朋親不若比翼連他人雖同盟骨肉天性然周

公穆康叔管蔡則流言子臧讓千乘季札慕其賢

蒲生行浮萍篇

浮萍寄清水隨風東西流結髮辭嚴親來為君子仇恪勤在朝夕無端獲罪尤在昔蒙恩惠和樂如瑟琴何意今摧頽曠若參與商茱萸自有芳不若桂與蘭新人雖可愛無若故所歡行雲有反期君恩儻中還慊慊仰天歎愁心將何憇日月不恒處人生忽若寓悲風來入懷淚下如垂露發篋造裳衣裁縫紝與素懷一作帷裳一作新○談藝錄

云詩不能受瑕工拙之間相去無幾頓自絕殊如塘上行云莫以賢豪故棄捐素所愛莫以魚肉賤棄捐葱與薤莫以麻枲賤棄捐菅與蒯浮萍篇則曰菜莫自有芳不若杜與蘭新人雖可愛無若故所歡本自倫語然佳不如塘上行藝苑卮言云洛神賦王右軍大令各書數十本當是晉人極推之耳清徹圓麗神女之流陳王諸賦皆小言無及者然此賦始名感甄又以蒲生當其塘上際此忌兄而不自匿諱何也蒲生實不如塘上令洛神見之未免笑子建倉父耳

當來日大難

樂府解題云曹植擬善哉行為日苦短

日苦短樂有餘乃置玉樽辦東厨廣情故心相於闔門置酒和樂欣欣遊馬後來轅車解輪今日同堂出門異

鄉別易會難各盡杯觴

丹霞蔽日行

魏文帝詩云丹霞蔽日采虹垂天明帝步出夏門行亦云

紂為昏亂虐殘忠正周室何隆一門三聖牧野致功天
亦革命漢祚之興階秦之衰雖有南面王道陵夷炎光
再幽殄滅無遺

野田黃雀行

高樹多悲風海水揚其波利劍不在掌結友何須多不
見籬間雀見鵠自投羅羅家得雀喜少年見雀悲拔劍

捎羅網黃雀得飛飛飛摩蒼天來下謝少年

談藝錄
云氣本

尚壯亦忌銳逸魏祖云老驥伏櫪志在千里烈士暮年壯心不已猶曖曖也思王野田黃雀行譬如錐出囊中

大索露矣

門有萬里客

門有萬里客問君何鄉人褰裳起從之果得心所親挽裳對我泣太息前自陳本是朔方士今為吳越民行行將復行去去適西秦

泰山梁甫行

八方各異氣千里殊風雨劇哉邊海民寄身於草野妻
子象禽獸行止依林阻柴門何蕭條狐兔翔我宇

怨詩行

明月照高樓流光正徘徊上有愁思婦悲歎有餘哀一解

借問歎者誰自云蕩子妻夫行踰十載賤妾常獨棲二解

念君過於渴思君剝於飢君作高山柏妾為濁水泥三解

北風行蕭蕭烈烈入吾耳心中念故人淚墮不能止

浮沉各異路會合當何諧願作東北風吹我入君懷四解

五解

君懷常不開賤妾當何依恩情中道絕流止任東西

六解

我欲竟此曲此曲悲且長今日樂相樂別後莫相忘

七解

栢一作桐○右一曲晉樂所奏七哀此篇本辭○呂氏童蒙訓云讀古詩十九首及曹子建諸詩如明月照高樓流光正徘徊之類皆思深遠而有餘意言有盡而意無窮也學者當以此等詩常自涵養自然下筆高妙

怨歌行

伎錄樂府解題作古辭

怨歌行

郭茂倩樂府作曹植

為君既不易為臣良獨難忠信事不顯乃有見疑患周

公佐成王金縢功不刊推心輔王室二叔反流言待罪

居東國泣涕常流連皇靈大動變震雷風且寒拔樹偃

秋稼天威不可干素服開金縢感悟求其端公旦事既

顯成王乃哀歎吾欲竟此曲此曲悲且長今日樂相樂

別後莫相忘

右一曲晉
樂所奏

鼙舞歌五首

序曰漢靈帝西園鼓吹有李堅者能鞬舞遭

亂西隨段熲先帝聞其舊有技召之堅既中

廢兼古曲多謬誤故改作新歌五篇

古今樂錄云漢

曲五篇一曰關東有賢女二曰章和二年中三曰樂久長四曰四方皇五曰殿前生桂樹

並章帝造魏曲五篇一明明魏皇帝二大和
有聖帝三魏歷長四天生烝民五為君既不
易並明帝造以代漢曲其辭並亡陳思王又
有五篇一聖皇篇以當章和二年中二靈芝
篇以當殿前生桂樹三大魏篇以當漢吉昌
四精微篇以當闕中有賢女五孟冬篇以當
狡兔按漢曲無漢吉昌狡兔二篇疑樂久長
四方皇是也隋書樂志云鞞舞漢巴渝舞也
按樂錄隋志並以鞞舞為巴渝今考漢魏二
篇歌辭各異本不相亂蓋因梁陳之世於鞞
舞前作巴渝弄遂云一舞二名殊不知二舞
亦容合作猶巾舞以白紵送豈得便謂白紵
為巾舞邪失之遠矣

聖皇篇

聖皇應厯數正康帝道休九州咸賓服威德洞八幽三
公奏諸公不得久淹留蕃位任至重舊章咸率由侍臣
省文奏陛下體仁慈沉吟有愛戀不忍聽可之迫有官
典憲不得顧恩私諸王當就國璽綬何累繩便時舍外
殿宮省寂無人主上增顧念皇母懷苦辛何以為贈賜
傾府竭寶珍文錢百億萬采帛若烟雲乘輿服御物錦
羅與金銀龍旛垂九旒羽蓋參班輪諸王自計念無功
荷厚德思一效筋力糜軀以報國鴻臚擁節衛副使隨

經營貴戚並出送夾道交輜輶車服齊整設韓眩耀天
精武騎衛前後鼓吹簫笳聲祖道魏東門淚下靄冠纓
扳蓋因內顧俛仰慕同生行行將日暮何時還闕庭車
輪為徘徊四馬躊躇鳴路人尚酸鼻何況骨肉情

靈芝篇

靈芝生王地朱草被洛濱榮華相晃耀光采眩若神古
時有虞舜父母頑且嚚盡孝於田壠蒸蒸不違仁伯瑜
年七十綵衣以娛親慈母苔不痛歎歎涕霑巾丁蘭少

失母自傷蚤孤斃刻木當嚴親朝夕致三牲暴子見陵
侮犯罪以亡形丈人為泣血免戾全其名董永遭家貧
父老財無遺舉假以供養傭作致甘肥責家填門至不
知何用歸天靈感至德神女為秉機歲月不安居嗚呼
我皇考生我既已晚棄我何其早蓼莪誰所興念之令人
老退詠南風詩灑淚滿禕袍亂曰聖皇君四海德教
朝夕宣萬國咸禮讓百姓家肅虔庠序不失儀孝弟處
中田戶有曾閔子比屋皆仁賢髫齡無夭齒黃髮盡其

年陛下三萬歲慈母亦復然

固學紀聞云陳思王靈芝篇云伯瑜年七十綠衣以

娛親今人但知老菜

子之事而不知伯瑜

大魏篇

大魏應靈符天祿方甫始聖德致泰和神明為驅使左
右為供養中殿宜皇子陛下長壽考羣臣拜賀咸悅喜
積善有餘慶寵祿固天常衆喜填門至臣子蒙福祥無
患及陽遂輔翼我聖皇衆吉咸集會凶邪姦惡並滅亡
黃鸝遊殿前神鼎周四阿玉馬克乘輿芝蓋樹九華白

虎戲西除舍利從辟邪駢驥躡足舞鳳皇拊翼歌豐年
大置酒玉樽列廣庭樂飲過三爵朱顏暴已形式宴不
違禮君臣歌鹿鳴樂人舞鼙鼓百官雷抃讚若驚諸禮
如江海積善若陵山皇嗣繁且熾孫子列曾玄羣臣咸
稱萬歲陛下長壽樂年御酒停未飲貴戚跪東廂侍人
承顏色奉進金玉觴此酒亦真酒福祿當聖皇陛下臨
軒笑左右咸歡康杯來一何遲羣僚以次行賞賜累千
億百官並富昌

精微篇

精微爛金石至心動神明杞妻哭死夫梁山為之傾子
丹西質秦烏白馬角生鄒衍囚燕市繁霜為夏零闋東
有賢女自字蘇來卿壯年報父仇身沒垂功名女休逢
赦書白刃幾在頸俱上列仙籍去死獨就生太倉令有
罪遠徵當就拘自悲居無男禍至無與俱縗縈痛父言
荷擔西上書盤桓北闕下泣淚何連如乞得并姊弟沒
身贖父軀漢文感其義肉刑法用除其父得以免辯義

在列圖多勇亦何為一女足成居簡子南渡河津吏廢
舟船執法將加刑女娟擁櫂前妾父聞君來將涉不測
淵畏懼風波起禱祝祭名川備禮饗神祇為君求福先
不勝齠祀誠至令犯罰難君必欲加誅乞使知罪誓妾
願以身代至誠感蒼天國君高其義其父用赦原河激
奏中流簡子知其賢歸聘為夫人榮寵超後先辯女解
父命何況健少年黃初發和氣明堂德教施治道致太
平禮樂風俗移刑措民無枉怨女復何為聖皇長壽考

景福常來儀

孟冬篇

孟冬十月陰氣厲清武官誠田講旅統兵元龜襲吉元
光著明蚩尤蹕路風弭雨停乘輿啟行鸞鳴幽軋虎貢
采騎飛象珥鵠鐘鼓鏗衛簫管嘈唱萬騎齊鑣千乘等
蓋夷山填谷平林滌藪張羅萬里盡其飛走趯趯狡兔
揚白跳翰獵以青骭掩以脩竿韓盧宋鵠呈才騁足噬
不盡縹牽麋掎鹿魏氏發機養基撫弦都盧尋高搜索

猴猿慶忌孟賁蹈谷超巒張目決眴髮怒穿冠頓熊扼虎蹴豹搏羆氣有餘勢負象而趨獲車既盈日側樂終罷能役解徒大饗離宮亂曰聖皇臨飛軒論功校獵徒死禽積如京流血成溝渠明詔大勞賜大官供有無走馬行酒醴驅車布肉魚鳴鼓舉觴爵擊鐘醻無餘絕綱縱麟麑弛罩出鳳雛收功在羽校威靈振鬼區陛下長歡

樂永世合天符

網一作
樵曲

桂之樹行

桂之樹桂之樹桂生一何麗佳揚朱華而翠葉流芳布天涯上有棲鸞下有盤螭桂之樹得道之真人咸來會講仙教爾服食日精要道甚省不煩淡泊無為自然乘蹻萬里之外去留隨意所欲存高高上際於衆外下下乃窮極地天

當牆欲高行

龍欲升天須浮雲人之仕進待中人衆口可以鑠金讒言三至慈母不親憤憤俗間不辯偽真願欲披心自說

陳君門以九重道遠河無津

當欲游南山行

東海廣且深由卑下百川五嶽雖高大不逆垢與塵良木不十圍洪條無所因長者能博愛天下寄其身大匠無棄材船車用不均錐刀各異能何所獨郤前嘉善而矜愚大聖亦同然仁者各壽考四坐咸萬年

當事君行

人生有所賈尚出門各異情朱紫更相奪色雅鄭異音

聲好惡隨所愛憎追舉逐聲名百心可事一君巧詐寧拙誠

當車以駕行

歡坐玉殿會諸貴客侍者行觴主人離席顧視東西廂
絲竹與鞞鐸不醉無歸來明燈以繼夕

妾薄命二首

携玉手喜同車北上雲閣飛除釣臺蹇產清虛池塘觀
沼可娛仰泛龍舟綠波俯擢神草枝柯想彼宓妃洛河

退詠漢女湘娥觀一靈

其二

日月既逝西藏更會蘭室洞房華燈步障舒光皎若日
出扶桑促樽合坐行觴主人起舞盃盤能者穴觸別端
騰觚飛爵闌干同量等色齊顏任意交屬所歡朱顏發
外形蘭袖隨禮容極情妙舞僂僂體輕裳解履遺絕纓
俛仰笑喧無呈覽持佳人玉顏齊舉金爵翠盤手形羅
袖良難腕弱不勝珠環坐者歎息舒顏御巾裛粉君傍

中有霍納都梁雞舌五味襍香進者何人齊姜恩重愛
深難忘召延親好宴私但歌盃來何遲客賦既醉言歸
主人稱露未晞日月既逝藝文作日既逝矣華燈步障
舒光玉臺作花燭步帳輝煌舉玉臺作

接

名都篇

歌錄云名都美女白馬並齊瑟行也皆以首句名篇

名都多妖女京洛出少年寶劍直千金被服麗且鮮鬪
雞東郊道走馬長楸間馳騁未能半雙兔過我前攬弓
捷鳴鏑長驅上南山左挽因右發一縱兩禽連餘巧未

及展仰手接飛鳶觀者咸稱善衆工歸我妍歸來宴平

樂美酒斗十千膾鯉脯胎鰣炮鼈炙熊蹯鳴儔嘯匹侷

列坐竟長筵連翩擊鞠攘巧捷惟萬端白日西南馳光

景不可攀雲散還城邑清晨復來還

復齋謾錄云曹植詩關雞東郊道走

馬長楸間陳沈炯邊馬有歸心詩彌意長楸道金鞍背

落暉杜子美玉腕驅詩頓驂飄赤汗跕躅顧長楸畫馬

圖詩霜蹄蹴踏長楸間苔溪漁隱云文選注古人種楸

於道故曰長楸野客叢書云歷陽郭次象多聞嘗與僕

論唐酒價郭謂前輩引老杜詩速令相就飲一斗恰有三百青銅錢以此知當時酒價然白樂天與劉夢得沽酒間飲詩曰共把十千沽一斗相看七十欠三年當劉

白之時酒價何太不廉哉僕謂不然十千一斗乃詩人

寓言此曹子建樂府中語目唐人引此甚多如李白詩
曰金樽沽酒斗十千王維詩曰新豐美酒斗十千崔國
輔詩云與沽一斗酒恰用十千錢許渾詩云十千沽酒
留君醉權德輿詩云十千斗酒不知貴陸龜蒙詩云若
得奉君歡十千沽一斗唐人言十千一斗類然一斗三
百錢獨見子美所云故引以定當時之價然詩人所言
出於一時又未知果否一斗三百別無可據唐食貨志
云德宗建平三年禁民酤以佐軍費置四釀酒斛收直
三千此可驗乎又觀楊松玠談叢北齊盧思道嘗云長
安酒賤斗價三百杜詩引此亦未可知僕因謂郭曰曾
知漢酒價否郭無以應僕謂漢酒價每斗一千郭謂出
於何書僕曰此見典論云考靈帝末年百司酒酒一斗
直千文此可證也丹鉛餘錄云古書不可妄改聊舉一
端如曹子建名都篇膾鯉腸胎蝦寒鼈炙熊脯此舊本
也五臣妄改作烹鼈文選李善注云今之時餉謂之寒
蓋韓國饌用此法鹽鐵論羊淹雞寒崔駰傳亦有雞寒

曹植文寒鶴蒸麌劉熙釋名韓雞為正古字寒與韓通也按丹鉛此論誠為有據然詩有云魚鼈膾鯉魚亦通

美女篇

美女妖且閑採桑歧路間柔條紛冉冉落葉何翩翩攘
袖見素手皓腕約金環頭上金爵釵腰佩翠琅玕明珠
交玉體珊瑚間木難羅衣何飄飄輕車隨風還顧盼遺
光彩長嘯氣若蘭行徒用息駕休者以忘餐借問女安
居乃在城南端青樓臨大路高門結重闌容華耀朝日
誰不希令顏媒氏何所營玉帛不時安佳人慕高義求

賢良獨難衆人徒噭噭安知彼所觀盛年處房室中夜
起長歎

白馬篇

白馬飾金羈連翩西北馳借問誰家子幽并遊俠兒少
小去鄉邑揚聲沙漠垂宿昔秉良弓楛矢何參差控弦
破左的右發摧月支仰手接飛猱俯身散馬蹄狡捷過
猿猿勇剽若豹螭邊城多警急胡虜數遷移羽檄從北
來厲馬登高隄長驅蹈匈奴左顧陵鮮卑棄身鋒刃端

性命安可懷父母且不顧何言子與妻名編壯士籍不得中顧私捐軀赴國難視死忽如歸

苦思行

綠蘿緣玉樹光曜粲相暉下有兩真人舉翅飄高飛我心何踴躍思欲攀雲追鬱鬱西岳顛石室青葱與天連中有者年一隱士鬚髮皆皓然策杖從吾遊教我要忘言

言

升天行二首

樂府解題云曹植又有上仙錄與神遊五遊龍欲升天等篇皆傷人

世不永俗情險艱當求神仙翹翔六合之
外與飛龍仙人二遊篇前緩聲歌同意

乘蹠追術士遠之蓬萊山靈液飛素波蘭桂上參天元
豹遊其下翔鶴戲其顛乘風忽登舉彷彿見衆仙

其二

扶桑之所出乃在朝陽谿中心陵蒼昊布葉蓋天涯日
出登東幹既夕沒西枝願得紓陽轡迴日使東馳

五遊篇

九州不足步願得凌雲翔逍遙八紘外遊目歷遐荒披

我丹霞衣襲我素霓裳華蓋紛掩謁六龍仰天驥曜靈
未移景倏忽造昊蒼閭闔啟丹扉雙闕曜朱光徘徊文
昌殿登陟太微堂上帝休西櫺羣后集東廂帶我瓊瑤
佩漱我沆瀣漿踟躕玩靈芝徙倚弄華芳王子奉仙藥
羨門進竒方服食享遐紀延壽保無疆

遠遊篇

楚辭遠遊章云悲時俗之迫阨兮願輕舉而遠遊質菲薄而無因兮焉託乘而

上浮王逸云遠遊者屈原之所作也屈原履方直之行不容於世困於讒佞無所告訴乃

思與仙人俱遊戲周

歷天地無所不至焉

遠遊臨四海俯仰觀洪波大魚若曲陵承浪相經過靈
鼈戴方丈神岳儼嵯峨仙人翔其隅玉女戲其阿瓊蓋
可療飢仰首吸朝霞崑崙本吾宅中州非我家將歸謁
東父一舉超流沙鼓翼舞時風長嘯激清歌金石固易
獎日月同光華齊年與天地萬乘安足多

仙人篇

樂府廣題云秦始皇三十六年使博士為仙真人詩遊行天下令樂人歌之曹植仙人篇曰仙人攬六著言人生如寄當養

羽翼徘徊九天以從韓終王喬於天衢也齊

陸瑜又有仙人攬六著篇蓋出於此

仙人攬六著對博太山隅湘娥撫琴瑟秦女吹笙竽玉樽盈桂酒河伯獻神魚四海一何局九州安所如韓終與王喬要我於天衢萬里不足步輕舉凌太虛飛騰踰景雲高風吹我軀迴駕觀紫微與帝合靈符閭閻自嗟峨雙闕萬丈餘玉樹扶道生白虎夾門樞驅風遊四海東過王母廬俯觀五岳間人生如寄居潛光養羽翼進趣且徐徐不見昔軒轅升龍出鼎湖徘徊九天下與爾長相須

長相須

飛龍篇 楚辭離騷云為余駕飛龍兮雜瑶象以
為車曹植飛龍篇亦言求仙者乘飛龍

而昇天與

楚辭同意

晨遊泰山雲霧窈窕忽逢二童顏色鮮好乘彼白鹿手

翳芝草我知真人長跪問道西登玉堂金樓複道授我

仙藥神皇所造教我服食還精補腦壽同金石永世難

老

鬪雞篇

春秋左氏傳云季郈之鬪雞季氏介其

雞郈氏為之金距杜預云擣芥子搘其

羽也或云以膠沙搘之為介雞鄼都故事云

魏明

帝大和中築鬪雞臺趙王石虎亦以芥

羽漆砂鬪雞于此故曹植詩云

鬪雞東郊道走馬長楸間是也

遊目極妙伎清聽厭宮商主人寂無為衆賓進樂方長
筵坐戲客鬪雞觀閒房羣雄正翕赫雙翅自飛揚揮羽
邀清風悍目發朱光觜落輕毛散嚴距往往傷長鳴入
青雲扇翼獨翱翔願蒙狸膏助常得擅此場

盤石篇

盤石山巔石飄颻澗底蓬我本太山人何為客淮東嗟
葭彌斥土林木無分重岸巖若崩缺湖水何洶洶蚌蛤

被濱涯光彩如錦虹高彼凌雲霄浮氣象螭龍鯨脊若丘陵鬚若山上松呼吸吞船櫂澎湃戲中鴻方舟尋高價珍寶麗以通一舉必千里乘颶舉帆幢經危履險阻未知命所鍾常恐沈黃爐下與鼈鼈同南極蒼梧野遊眄窮九江中夜指參辰欲師當定從仰天長太息思想懷故邦乘桴何所志吁嗟我孔公

驅車篇

驅車揮駑馬東到奉高城神哉彼太山五嶽專其名隆

高貴雲霓嵯峨出太清周流二六堠間置十二亭上有
涌醴泉玉石揚華英東北望吳野西眺觀日精魂神所
繫屬逝者感斯征王者以歸天效厥元功成厯代無不
遵禮記有品程探策或長短唯德享利貞封者七十帝
軒皇元獨靈食霞漱沆瀣毛羽被身形發舉躡虛廊徑
庭升窈冥同壽東父年曠代永長生

種葛篇

種葛南山下葛藟自成陰與君初婚時結髮恩義深歡

愛在枕席宿昔同衣衾竊慕棠棣篇好樂和瑟琴行年
將晚暮佳人懷異心思紀曠不接我情遂抑沈出門當
何顧徘徊步北林下有交頸獸仰見雙棲禽攀枝長歎
息淚下沾羅襟良馬知我悲延頸代我吟昔為同池魚
今為商與參往古皆歡遇我獨困於今棄置委天命悠
悠安可任

棄婦篇

石榴植前庭綠葉搖縹青丹華灼烈烈璀璨有光榮光

紫眸流離可以處淑靈有鳥飛來集拊翼以悲鳴悲鳴
夫何為丹華實不成拊心長歎息無子當歸寧有子月
經天無子若流星天月相終始流星沒無精棲遲失所
宜下與瓦石并憂懷從中來歎息通雞鳴反側不能寐
逍遙於前庭踟躕還入房肅肅帷幕聲寥寥更搆帶撫
絃調鳴箏慷慨有餘音要妙悲且清收淚長歎息何以
負神靈招搖待霜露何必春夏成晚獲為良實願君且

安寧

上責躬應詔詩

魏書云植文帝弟建安中封平原侯徙臨菑侯既以才見異而

太子者數矣而植任性而行不自彫勵飲酒不節文帝御之以術矯情自飾故遂定為嗣文帝即王位誅丁儀丁廙植與諸侯並就國黃初二年監國謁者灌均希指奏植醉酒悖慢劫脅使者有司請治罪帝以太后故貶爵安鄉侯其年改封鄆城侯三年立為鄆城王四年徙封雍丘王其年朝京都上疏并獻詩又有應詔詩帝嘉其詞義優詔答勉之

臣自抱釁歸藩刻肌刻骨追思罪戾晝分而食夜分而寢誠以天網不可重離聖恩難可

再恃竊感相鼠之篇無禮遄死之義形影相
弔五情愧赧以罪棄生則違古賢夕改之勸
忍活苟全則犯詩人胡顏之譏伏惟陛下德
象天地恩隆父母施暢春風澤如時雨是以
不別荆棘者慶雲之惠也七子均養者尸鳩
之仁也舍罪責功者明君之舉也矜愚愛能
者慈父之恩也是以愚臣徘徊於恩澤而不
能自棄者也前奉詔書臣等絕朝心離志絕

自分黃耇無復執珪之望不圖聖詔猥垂齒
召至止之日馳心輦轂僻處西館未奉闕庭
踊躍之懷瞻望反仄謹拜表獻詩二篇其辭

曰

於穆顯考時惟武皇受命于天寧濟四方朱旗所拂九
土披攘玄化滂流荒服來王超商越周與唐比蹤篤生
我皇奕世載聰武則肅烈文則時雍受禪于漢君臨萬
邦萬邦既化率繇舊則廣命懿親以藩王國帝曰爾侯

君茲青土奄有海濱方周于魯車服有輝旗章有敘濟
濟雋乂我弼我輔伊予小子恃寵驕盈舉挂時網動亂
國經作藩作屏先軌是隳傲我皇使犯我朝儀國有典
刑我削我紂將寘于理元兇是率明明天子時惟篤類
不忍我刑暴之朝肆違彼執憲哀予小臣改封究邑于
河之濱股肱弗置有君無臣荒淫之闕誰弼予身煢煢
僕夫于彼冀方嗟予小子乃罹斯殃赫赫天子恩不遺
物冠我玄冕要我朱紱光光大使我榮我華剖符受玉

王爵是加仰齒金璽俯執聖策皇恩過隆祇承休惕咨

我小子頑兇是嬰逝慙陵墓存愧闕庭匪敢傲德實恩

是恃威靈改加足以沒齒昊天罔極生命不圖常懼顛

沛抱罪黃爐願蒙矢石建旗東嶽庶立毫釐微功自贖

危軀授命知足免戾甘赴江湘奮戈吳越天啟其衷得

會京畿遲奉聖顏如渴如飢心之云慕愴矣其悲天高

聽卑皇宵照微

于漢魏志作炎漢紂集作黜時惟萬類一作時萬同類臣一作子大一作天下

一作土生

魏志作性

應詔詩

李周翰云應詔來京師於道所見對詔而作

肅承明詔應會皇都星陳夙駕秣馬脂車命彼掌徒肅
我征旅朝發鸞臺夕宿蘭渚芒芒原隰祁祁士女經彼
公田樂我稷黍爰有樛木重陰匪息雖有饋糧飢不遑
食望城不過面邑不游僕夫警策平路是繇元駟藹藹
揚鎣漂沫流風翼衡輕雲承蓋涉澗之濱緣山之隈遵
彼河滸黃坂是階西躋闕谷或降或升駢驥倦路載寢
載興將朝聖皇匪敢晏寧弭節長駕指日遄征前驅舉

燧後乘抗旌輪不輶運鑿無廢聲爰暨帝室枕此西墉
嘉詔未賜朝覲莫從仰瞻城闕俯惟闕庭長懷永慕憂
心如醒

朔風詩

李周翰云時為東阿王在藩感北風思歸故有此詩文選總一章集作五章今

分注為五章而不顯

列其數蓋兩存之也

仰彼朔風用懷魏都願騁代馬倏忽北徂凱風永至思
彼蠻方願隨越鳥翻飛南翔其一四氣代謝懸景運周別
如俯仰脫若三秋昔我初遷朱華未晞今我旋止素雪
如俯仰脫若三秋昔我初遷朱華未晞今我旋止素雪

云飛

其二

俯降千仞仰登天阻風飄蓬飛載離寒暑千仞

易陟天阻可越昔我同袍今永乖別

其三

子好芳草豈忘爾貽繁華將茂秋霜悴之君不垂眷豈云其誠秋蘭可

喻桂樹冬榮

其四

絃歌蕩思誰與銷憂臨川慕思何為汎

舟豈無和樂游非我隣誰忘泛舟愧無榜人

其五

○蜩笑外稿云

小雅云昔我往矣楊柳依依今我來思雨雪霏霏又云
昔我往矣黍稷方華今我來思雨雪載塗可謂善道行
役之情矣曹子建效其語云昔我初遷朱華未晞今我
旋止素雪云飛則不遠矣且子建欲學風雅為四言
而猶未忘朱華素雪之屬對此其所以止於建安黃初歟

矯志詩

芝桂雖芳難以餌烹戶位素餐難以成名磁石引鐵於
金不連大朝舉士愚不聞焉抱璧塗乞無為貴寶履仁
邁禍無為貴道駕雛遠害不羞卑棲靈虬避難不耻汚
泥都蕪雖甘杖之必折巧言雖美用之必減濟濟唐朝
萬邦作孚闕逢蒙雖巧必得良弓聖主雖知必得英雄
螳螂見歎齊士輕戰越王軾蛙國以死獻道遠知驥世
偽知賢覆之幬之順天之矩澤如凱風惠如時雨口為

禁闈舌為發機門機之闈棓矢不追

芝桂雖芳今本作芳樹雖香聖藝文

作賢必得藝

文作亦待

元會詩

晉書禮志漢儀有正會禮正旦受賀公侯以下執賚來庭二千石以上升殿稱

歲復作樂燕饗魏帝都

都正會文昌殿用漢儀

初歲元祚吉日惟良乃為嘉會宴此高堂衣裳鮮潔黼黻玄黃珍膳襍遝克溢圓方俯視文軒仰瞻華梁願保茲善千載為常歡笑盡娛樂哉未央皇室榮貴壽考無

疆室善一作喜

閨情

有美一人被服纖羅妖姿艷麗
鹿翁若春華紅顏韙曠雲
髻嵯峨彈琴撫節為我絃歌清濁齊均既亮且和取樂
今日遑恤其他

公讌詩

此在鄴宮與兄丕讌飲時
武帝在故稱丕為公子

公子敬愛客終宴不知疲清夜遊西園飛蓋相追隨明
月澄清影列宿正參差秋蘭被長坂朱華冒綠池潛魚
躍清波好鳥鳴高枝神飈接丹轂輕輦隨風移飄颻放

志意千古長若斯

詩家直說云子建已有響字朱華冒綠池時雨靜飛塵冒靜二字是矣

侍太子坐

白日曜青春時雨靜飛塵寒冰碎炎景涼風飄我身清

醴盈金觴餚饌縱橫陳齊人進奇樂歌者出西秦翩翩

我公子機巧忽若神

景一作氣

奇一作嘉

贈徐幹

劉良云子建與徐幹俱不見用有怨刺之意故為此詩

驚風飄白日忽然歸西山圓景光未滿衆星燦以繁志士營世業小人亦不閒聊且夜行游游彼雙闕間文昌

鬱雲興迎風高中天春鳩鳴飛棟流焱激櫓軒顧念蓬
室士貧賤誠足憐徽藿弗充虛皮褐猶不全慷慨有悲
心興文自成篇寶棄怨何人和氏有其愆彈冠俟知已
知己誰不然良田無晚歲膏澤多豐年亮懷璠璿美積
久德逾宣親交義在敦申章復何言

逾五臣作愈

贈丁儀

李善云與都亭侯丁翼今云儀誤也魏
畧曰丁儀字正禮太祖辟為掾呂向云
魏志儀有文才子建贈

以此詩有怨刺之意

初秋涼氣發庭樹微銷落凝霜依玉除清風飄飛閣朝

雲不歸山霖雨成川澤黍稷委疇隴農夫安所獲在貴
多忘賤為恩誰能博孤白足禦冬焉念無衣客思慕延
陵子寶劍非所惜子其寧爾心親交義不薄

禦五臣作御

贈王粲

端坐苦愁思攬衣起西游樹木發春華清池激長流中
有孤鶯鶯哀鳴求匹儔我願執此鳥惜哉無輕舟欲歸
忘故道顧望但懷愁悲風鳴我側羲和逝不留重陰潤
萬物何懼澤不周誰令君多念自使懷百憂

又贈丁儀王粲

集云答丁敬禮王仲宣

善云翼字敬禮儀誤也

從軍度函谷驅馬過西京
山岑高無極涇渭揚濁清壯哉
帝王居佳麗殊百城員闕出浮雲承露槩泰清皇佐揚天惠四海無交兵權家雖愛勝全國為令名君子在末位不能歌德聲丁生怨在朝王子歡自營歡怨非貞則中和誠可經

岑一作峯

贈丁翼

文士傳云翼字敬禮儀

之弟也為黃門侍郎

嘉賓填城闕豐膳出中厨吾與二三子曲宴此城隅秦

箏發西氣齊瑟揚東謳肴不虛歸觴至反無餘我豈
狎異人朋友與我俱大國多良材譬言海出明珠君子義
休侍小人德無儲積善有餘慶榮枯立可須滔蕩固大
節時俗多所拘君子通大道無願為世儒

贈白馬王彪

集云於圈城作魏志云楚王彪字朱虎時封白馬王後徙封楚任城

王彰字子文並武帝子彰建安中為北中郎將伐烏丸有功文帝黃初三年為任城王四年朝京不即得見忿怒暴薨○藝苑卮言云子建謁帝承明廬明月照高樓子桓西北有浮雲秋風蕭瑟非鄴中諸子可及仲宣公幹遠在下風吾每至謁帝一章便數十過不可

了悲婉宏壯情事理境無所不有又云陳思
王贈白馬王彪詩全法大推文王之什體以
故首二章不相承耳後人不知合而為一者良可笑也

序曰黃初四年正月白馬王任城王與余俱
朝京師會節氣到洛陽任城王薨至七月與
白馬王還國後有司以二王歸蕃道路宜異
宿止意每恨之蓋以大別在數日是用自剖

與王辭焉憤而成篇

謁帝承明廬逝將歸舊疆清晨發皇邑日夕過首陽伊

洛廣且深欲濟川無梁汎舟越洪濤怨彼東路長顧瞻
戀城闕引領情內傷

廣一作曠

其二

大谷何寥廓山樹鬱蒼蒼霖雨泥我塗流潦浩縱橫中
達絕無軌改轍登高岡修坂造雲日我馬元以黃

五作大五

太

其三

元黃猶能進我思鬱以紝鬱紝將何念親愛在離居本

圖相與偕中更不克俱鴟梟鳴衡輶豺狼當路衢蒼蠅
間白黑讒巧令親疎欲還絕無蹊覽轡止踟蹰

何念今本作難

進令今
本作反

其四

踟蹰亦何留相思無終極秋風發微涼寒蟬鳴我側原
野何蕭條白日忽西匿歸鳥赴喬林翩翩厲羽翼孤獸
走索羣銜草不遑食感物傷我懷撫心長太息

太魏志作嘆

其五

太息將何為天命與我違奈何念同生一往形不歸孤
窶翔故域靈柩寄京師存者忽復過亡沒身自衰人生
處一世去若朝露晞年在桑榆間影響不能追自顧非
金石咄嗟令心悲

復一作已
咄一作咤

其六

心悲動我神棄置莫復陳丈夫志四海萬里猶比隣恩
愛苟不虧在遠分日親何必同衾幬然後展殷勤憂思
成疾疹無乃兒女仁倉卒骨肉情能不懷苦辛

其七

苦辛何慮思天命信可疑虛無求列仙松子久吾欺戀
故在斯須百年誰能持離別永無會執手將何時王其
愛玉體俱享黃髮期收淚即長路援筆從此辭

路志作塗

送應氏詩二首

劉良云送璩瑪兄弟時董卓遷獻帝于西京洛陽被燒故多言

荒蕪

之事

步登北邙阪遙望洛陽山洛陽何寂寞宮室盡燒焚垣
牆皆頓辟荆棘上參天不見舊耆老但覩新少年側足

無行徑荒疇不復田游子久不歸不識陌與阡中野何

蕭條千里無人烟念我平常居氣結不能言

平常居一作平生親

其二

清時難屢得嘉會不可常天地無終極人命若朝霜願得展嬿婉我友之朔方親昵並集送置酒此河陽中饋豈獨薄賓飲不盡觴愛至望苦深豈不愧中腸山川阻且遠別促會日長願為比翼鳥施翮起高翔

昵五臣作隘

三良詩

左傳云泰伯任好卒以子車氏三子奄息仲行鍼虎為殉皆泰之良也詩人作

黃鳥以哀之劉良云植被文帝責
黜意者是悔不從武帝而作是詩

功名不可為忠義我所安秦穆先下世三臣皆自殘生
時等榮樂既沒同憂患誰言捐軀易殺身誠獨難攬涕
登君墓臨穴仰天歎長夜何冥冥一往不復還黃鳥為
悲鳴哀哉傷肺肝

遊仙詩

人生不滿百戚戚少歡娛意欲奮六翮排霧凌紫虛蟬
蛻同松喬翻跡登昂湖翹翔九天上騁轡遠行遊東觀

扶桑曜西臨弱水流北極玄天渚南翔陟丹丘

戚戚一歲歲

玄天一
作登玄

襍詩六首

李善云此六篇並託喻傷政急朋友道絕賢人為人寫勢別京已後在鄆

城思鄉

而作

高臺多悲風朝日照北林之子在萬里江湖迥且深方舟安可極離思故難任孤鴈飛南游過庭長哀吟翹思慕遠人願欲托遺音形影忽不見翩翩傷我心

其二

轉蓬離本根飄颻隨長風何意廻飈舉吹我入雲中高
高上無極天路安可窮類此游客子捐軀遠從戎毛褐
不掩形薇藿常不充去去莫復道沈憂令人老

遊客一作流宕

其三

西北有織婦綺縞何纊紛明晨東機杼日昃不成丈太
息終長夜悲嘯入青雲妾身守空閨良人行從軍自期
三年歸今已歷九春飛鳥繞樹翔噭噭鳴索羣願為南

流景馳光見我君

飛玉臺作孤

其四

南國有佳人容華若桃李朝游江北岸夕宿瀟湘沚時
俗薄朱顏誰為發皓齒俛仰歲將暮榮耀難久恃

俛一作俯

夕宿瀟湘沚善

其五

僕夫早嚴駕吾將遠行遊遠行欲何之吳國為我仇將
騁萬里途東路安足由江介多悲風淮泗馳急流願欲
一輕濟惜哉無方舟閒居非吾志甘心赴國憂

速行五臣作行

遠都玄敬詩詁云曹子建雜詩間居非吾志甘心赴國憂又云國讐諒不塞甘心思喪元老瞞而有是兒寧不助其奸雄

其六

飛觀百餘尺臨牖御櫺軒遠望周千里朝夕見平原烈士多悲心小人媿自間國讐亮不塞甘心思喪元老劙西南望思欲赴太山絃急悲聲發聆我慷慨言

御五臣作仰

閨情

一作
雜詩

攬衣出中閨逍遙步兩楹閒房何寂寥綠草被堦庭空

室自生風百鳥翩南征春思安可忘憂戚與我并佳人

在遠道妾身單且斂歡會難再遇芝蘭不重榮人皆棄

舊愛若豈若平生穿松為女蘿依水如浮萍齋身奉衿

帶朝夕不墮傾儻終顧盼恩永副我中情

室一作穴儻終顧盼恩一

作儻能

終顧盼

七哀詩

玉臺作襍詩樂府

作怨歌行本辭

明月照高樓流光正徘徊上有愁思婦悲歎有餘哀借

問歎者誰言是蕩子妻君行踰十年孤妾常獨棲君若

清路塵妾若濁水泥浮沈各異勢會合何時諧願為西

南風長逝入君懷君懷良不開賤妾當何依

韻語陽秋云七哀詩

曹子建其次則王仲宣張孟陽釋詩者謂病而哀義而哀感而哀悲而哀耳目聞見而哀口歎而哀鼻酸而哀謂一事而七者具也子建之七哀在於獨棲之思婦仲宣之七哀在於棄子之婦人張孟陽之七哀在於已毀之園寢唐陶雍亦有七哀詩所謂君若無定雲妾作不動山雲行出山易山逐雲去難是皆以一哀而七者具也

情詩

玉臺作
雜詩

微陰翳陽景清風飄我衣遊魚潛綠水翔鳥薄天飛眇

眇客行士遙役不得歸始出嚴霜結今來白露晞遊子
歎黍離處者歌式微慷慨對嘉賓悽愴內傷悲

喜雨詩

天覆何彌廣苞育此羣生棄之必憔悴惠之則滋榮慶
雲從北來鬱述西南征時雨中夜降長雷周我庭嘉種
盈膏壤登秋畝有成

七步詩

本集不載世說新話云文帝嘗令東阿王七步中作詩不成者行大法應聲便

為詩云云

帝有慚色

煮豆持作羹漉豉以為汁箕向金下然豆在金中泣本

是同根生相煎何太急

箕向一作箕在
金下一作金中

煮豆燃豆萁豆在金中泣本是同根生相煎何太急

漫叟詩話云曹子建七步詩世傳煮豆燃豆萁豆在
金中泣一本云箕向金下燃豆在金中泣其工拙淺
深必有以

辨之者

失題

見藝文
鶴部

雙鶴俱遨遊相失東海傍雄飛竄北朔雌驚赴南湘棄
我交頸歡離別各異方不惜萬里道但恐天網張

離友詩二首

并序

余昔為太子洗馬魯公賈長淵以散騎常侍
侍東宮積年余出補吳王郎中令元康六年
入為尚書郎魯公贈詩一篇作此詩答之云爾

王旅遊兮背故鄉彼君子兮篤人綱膝余行兮歸朔方
馳原隰兮尋舊疆車載奔兮馬繁驥涉浮濟兮泛輕航
迄魏都兮息蘭房展宴好兮惟樂康車一作我車

其二

涼風肅兮白露滋木感氣兮柔葉辭臨滌水兮登重基

折秋華兮采靈芝尋永歸兮贈所思感離隔兮會無期

伊鬱悒兮情不怡

本集止載前一首今考藝文附入。初學記載二句云日匿景兮天微陰。

經迴路兮造北林

當別有一首也

妬詩

嗟爾同衾曾不是志寧彼冶容安此妬忌

觸體詩

牢落冥冥與道相驅隱然長寢其樂無踰

鹽歌

出自薊北門遙望胡池桑枝枝自相值葉葉自相當

樂府

墨出青松烟筆出狡兔翰古人感鳥跡文字有改判

芙蓉池

逍遙芙蓉池翩翩戲輕舟南楊棲雙鵠北柳有鳴鳩

言志

慶雲未時興雲龍潛作魚神鸞失其儔還從燕雀居

襍詩

悠悠遠行客去家千餘里出亦無所之入亦無所止浮雲翳日光悲風動地起

補遺

正會詩

初歲元祚吉日惟良乃為嘉會讌此高堂尊卑列叙典而有章衣裳鮮潔黼黻玄黃清酌盈爵中坐騰光珍膳雜遶充溢圓方笙磬既設琴瑟俱張悲歌厲響咀嚼清

商俯視文軒仰瞻華梁願保茲善千載為嘗歡笑盡娛

樂哉未央室家榮貴壽若東皇

本集前載並從藝文未全

樂府歌

膠漆至堅浸之則離皎皎素絲隨染色移君不我棄讒人所為

古詞

還行秋殿入侍君王椒房丹帷楚組連綱

樂府

市肉取肥醑酒取醇交觴接盃以致殷懃

苦熱行

行遊到日南經歷交趾鄉苦熱但暴露越夷水中藏

結客篇

結客少年場報怨洛北荒

樂府歌詞

所費千金劍通犀間碧璵翡翠飾雞璧標首明月珠

陌上桑

望雲際有真人安得輕舉繼清塵執電鞭馳飛麟

雜詩

美玉生磐石寶劍出龍淵帝王臨朝服秉此威百蠻

遺句

如彼翰鳥或飛戾天善哉復為時所拘羈紲作微臣天地

行

篇長者賜顏色泰山可動移豔歌巢許蔑四海商賈爭

一錢樂府齊謳楚舞紛紛歌聲上徹青雲歷九秋妾薄相行夏

節純和天清涼百草滋植舒蘭芳豔歌日匿景兮天微

行

陰經迴路兮造北林

離友詩

膏沐誰為容明鏡闇不治

七哀

詩人遠精神近寤寐夢容光

離別詩

一顧千金重何必珠

玉賤



漢魏六朝百三家集卷二十七



總校官庶吉士臣侍朝
校對官庶吉士臣何思鈞
謄錄監生臣袁文宿

欽定四庫全書叢要

集部

漢魏六朝百三家集卷二十九



詳校官候選知縣臣吳向華

欽定四庫全書

薈要卷一萬九千六百十七

集部

漢魏六朝百三家集卷二十八

明 張溥 輯

陳琳集

賦

武軍賦

有序

迴天軍於易水之陽以討瓊焉鴻溝參周鹿葦十里荐
之以棘為建修楠干青霄寢深隧下三泉飛雲梯衡神

鉤之具不在吳孫之篇三畧六韜之術者凡數十事秘
莫得聞也乃作武軍賦

赫赫哉烈烈矣於此武軍當天符之佐運承斗剛而曜震
漢季世之不辟青龍紀乎大荒熊狼競以擎攫神寶播乎
鎬京於是武臣赫然颺炎天之隆怒叫諸夏而號八荒爾
乃擬北落而樹表肺壘壁以結營百校羅峙千部列陳彌
方城掩平原於是啟明戒旦長庚告昏火烈具舉鼓角並
震千徒從唱億夫求和聲訇隱而動山光赫奕以燭夜其

刃也則楚金越冶崇谿名工清堅皓鍔脩刺銳鋒陸陷葉
犀水截輕鴻鎧則東胡闕鞚百煉精剛函師振旅韋人制
縫元元縹甲灼爍流光弩則幽都筋角恒山麋幹通肌暢
骨崇緼曲煙大黃沈紫直矢輕弦當鋒摧決貫遐洞堅其
弓則烏號越耗繁弱角端象弭繡質括拊文身矢則申息
肅慎箇箠空疏焦銅毒鍤麗轂撻馬則飛雲絕景直鬢
騶駢駿龍紫鹿文的蹕魚走駿驚鼯步象雲浮若乃清
道整列按節徐行龍姿鳳峙灼有遺英

又

鉤車轡轔九牛轉牽牽雷響激折櫓倒垣其攻也則飛
梯行雲臨閣靈構上通紫電下過三壚蘊隆既備越有
神鈞排雷衝則闕高闕烈炬然則頓名樓

又

衝鈞競進熊虎爭先墮垣百疊敝樓數千炎燧四舉元
戎齊登

又

整行按律決敵中原八部方置山布星陳干戈森其若
林牙旗翻以如繪

又

南轍反旆爰振其旅胡馬駢足戎車齊軌

神武賦

有序

建安十有二年大司空武平侯曹公東征烏丸六軍被
介雲輜萬乘治兵易水次於北平可謂神武奕奕有征
無戰者已

佇盤桓以淹次乃申命而後征觀狄民之故土追大晉
之遐蹤惡先縠之懲寇善魏絳之龢戎受金石而弗伐
蓋禮樂而思終陵九城而上濟起齊軌乎玉繩車軒轡
於雷室騎浮厲乎雲宮暉曜連乎白日旂旄繼於電光
旆既軼乎白狼殿未出乎盧龍威凌天地勢括十衝單
鼓未伐虜已潰崩克俊馘首梟其魁雄爾乃總輯環珍
茵氊幕幄攘瓔帶佩不飾雕琢華璫玉瑤金麟牙琢文
貝紫瑛縹碧玄綠黼錦纘組羃羃皮服

止欲賦

媛哉逸女在余東濱色曜春華豔過碩人乃遂古其寡
儔固當世之無鄰允宜國而寧家實君子之攸嬪伊余
情之是悅志荒溢而傾移宵炯炯以不寐晝舍食而忘
飢歎北風之好我美攜手之同歸忽日月之徐邁庶枯
楊之生梯道攸長而路阻河廣瀼而無梁雖企予而欲
往非一葦之可航展余轡以言歸含憐瘁而就牀忽假
暝其若寐夢所懽之來征魂翩翩以遙懷若交好而通

靈

神女賦

漢三士之建安荆野蠹而作仇贊皇師以南假濟漢川
之清流感詩人之攸歎想神女之來遊儀管魄於髡鬚
託嘉夢以通精望陽侯而滉漾覩玄麗之軼靈文絳艸
之奕奕鳴玉鸞之嚶嚶荅玉質於芳華擬豔姿於舜榮
感仲春之和節歎鳴鴈之噭噭申握椒以貽予請同宴
乎粵房苟好樂之嘉合永絕世而獨昌既歎爾以豔采

又悅我之長期順乾坤以成性夫何若而有辭

大暑賦

土潤溽以歠蒸時淟涊以潤溫風鬱其形形譬炎火之
陶燭

瑪瑙勒賦

有序

五官將得瑪瑙以為寶勒美其英綵之光豔也使琳賦
之

託瑤漢之寶岸臨赤水之朱波爾乃他山為錯荆和為

理制為寶勅以御君子

北堂抄誤寫魏文數語
為琳作今據御覽正之

迷迭賦

立碧莖之娜何舒綵條之蜿蜒下扶疎以布濩上綺錯而交紛匪苟方之可樂寔來儀之麗閑動容飾而發微穆斐斐以承顏

柳賦

偉姿逸態英豔妙奇綠條縹葉雜還纖麗龍鱗鳳翼綺錯交施蔚曇其杳靄象翠蓋之葳蕤

鸚鵡賦

咨乾坤之兆物萬品錯而殊形有逸姿之令鳥含嘉淑
之哀聲抱振鷺之素質被翠羽之縹精琳又太荒賦曰假龜筮以貞

吉問神諭以休祥

上書

為袁紹上漢帝書

臣聞昔有哀歎而霜隕悲哭而城崩者每讀其書謂為
信然於今況之乃知妄作何者臣出身為國破家立事

至於懷忠獲釁抱信見疑晝夜長吟剖肝泣血曾無崩
城隕霜之應故鄒衍杞婦何能感徹臣以負薪之資拔
於陪隸之中奉職憲臺擢授戎校常侍張讓等滔亂天
常侵奪朝威賊害忠德扇動奸黨故大將軍何進忠國
疾亂義心赫怒以臣頗有一介之節可責以鷹犬之功
故授臣以督司諳臣以方畧臣不敢畏憚強禦避禍求
福與進合圖事無違異忠策未盡而元帥受敗太后被
質宮室焚燒陛下聖德幼冲親遭危困時進既被害師

徒喪沮臣獨將家兵百餘人抽戈承明竦劒翼室虎叱
羣司奮擊凶醜曾不浹辰罪人斯殄此誠愚臣效命之
一驗也會董卓乘虛所圖不軌臣父兄親從並當大位
不憚一室之禍苟惟寧國之義故遂解節出奔創謀河
外時卓方貪結外援招悅英豪故即臣渤海申以軍號
則臣之與卓未有纖芥之嫌若使苟欲滑泥揚波偷榮
求利則進可以享竊祿位退無門戶之患然臣愚所守
志無傾奪故遂引會英雄興師百萬飲馬孟津歃血漳

河會故冀州牧韓馥懷挾逆謀欲專權勢絕臣軍糧不得踵係至使滑虜肆盡害及一門尊卑大小同日并戮鳥獸之情猶知號呼臣所以蕩然忘哀貌無隱戚者誠以忠臣之節道不兩立顧私懷已不能全功斯亦愚臣破家殉國之二驗也又黃巾十萬焚燒青兗黑山張楊蹈藉異域臣乃旋師奉辭伐畔金鼓未震狡敵知亡故韓馥懷懼謝咎歸土張楊黑山同時乞降臣時輒承制竊比竇融以議郎曹操權領兗州牧會公孫瓚師旅南

馳陸掠北境臣即星駕席卷與瓚交鋒假天之威每戰
輒克臣備公族子弟生長京輦頗聞俎豆不習干戈加
自乃祖先臣以來世作輔弼咸以文德盡忠得免罪戾
臣非與瓚角戎馬之勢爭戰陣之功者也誠以賊臣不
誅春秋所貶苟云利國專之不疑故冒踐霜雪不憚劬
勤實庶一捷之福以立終身之功社稷未定臣誠恥之
太僕趙岐銜命來征宣明陛下含弘之施蠲除細故與
下更新奉詔之日引師南轍是臣畏怖天威不敢怠慢

之三驗也又臣所上將校率皆清英宿德令名顯達登
鋒履刃死者過半勤恪之功不見書列而州郡牧守競
盜聲名懷持二端優游顧望皆列土錫圭跨州連郡是
以遠近狐疑議論紛錯者也臣聞守文之世德高者位
尊倉卒之時功多者賞厚陛下播越非所洛邑乏祀海
內傷心志士憤惋是以忠臣肝腦塗地肌膚橫分而無
恤心者義之所感故也今賞加無勞以擣有德杜黜忠
功以疑衆望斯豈腹心之遠圖將乃讒慝之邪說使之然

也臣爵為通侯位二千石殊恩厚德臣既叨之豈敢閼覬
重禮以希形弓旅矢之命哉誠傷偏裨列校勤不見紀
盡忠為國翻成重愆斯蒙恬所以悲號於邊獄白起歟
歎於杜郵也大傅日磾位為師保任祀東征而耗亂王
命寵任非所凡所舉用皆衆所捐棄而容納其策以為
謀主令臣骨肉兄弟還為讐敵交鋒接刃構難茲甚
臣雖欲釋甲投戈事不得已誠恐陛下日月之明有所
不照四聰之聽有所不聞乞下臣章咨之羣賢使三槐

九棘議臣罪戾若以臣今行權為釁則桓文當有誅絕之刑若以衆不討賊為賢則趙盾可無書弑之貳矣臣雖小人志守一介若使得申明本心不愧先帝則伏首歐刀褰衣就鑊臣之願也惟陛下垂尸鳩之平絕邪詔之論毋令愚臣結恨三泉

書

為袁紹與公孫瓚書

孤與足下既有前盟舊要申之以討亂之誓言過夷叔

分著丹青謂為旅力同仇足踵齊晉故解印釋紱以北
帶南分割膏腴以奉執事此非孤赤情之明驗邪豈寤
足下棄烈士之高義尋禍亡之險蹤輒而改慮以好易
怨盜遣士馬犯暴豫州始聞甲卒在南親臨戰陣懼於
飛矢迸流狂刃橫集以重足下之禍徒增孤子之咎釁
也故為薦書懇惻冀可改悔而足下逸然自逸矜其威
詐謂天罔可吞豪雄可滅果令貴弟殞於鋒刃之端斯
言猶在於耳而足下曾不尋討禍源克心罪已苟欲逞

其無疆之怒不顧逆順之津匿怨害民騁於余躬遂躍
馬控弦處我疆土毒徧生民辜延白骨孤辭不獲已以
登界橋之役是時足下兵氣霆震駿馬電發僕師徒肇
合機械不嚴強弱殊科衆寡異論假天之助小戰大克
遂陵躡奔背因壘館穀此非天威棐謀福豐有禮之符
表乎足下志猶未厭乃復糾合餘燼率我蛑賊以焚爇
渤海孤又不獲寧用及龍河之師羸兵前誘大軍未濟
而足下膽破衆散不敢而敗兵衆擾亂君臣並奔此又

足下之為非孤之咎也自此以後禍隙彌深孤之師旅
不勝其忿遂至積尸為京頭廬滿野愍彼無辜未嘗不
慨然失涕也後比得足下書辭意婉約有改往修來之
言僕既欣於舊好克復且愍兆民之不寧每輒引師南
駕以順簡書弗盈一時而北邊羽檄之文未嘗不至孤
是用痛心疾首靡所錯情夫處三軍之帥當列將之任
宜令怒如嚴霜喜如時雨臧否好惡坦然可觀而足下
二三其德強弱易謀急則曲躬緩則放逸行無定端言

無質要為壯士者固若此乎既乃殘殺老弱幽土憤怨
衆叛親離孑然無黨又烏丸滅貊皆與足下同州僕與
之殊俗各奮迅激怒爭為鋒銳又東西鮮卑舉踵來附
此非孤德所能招乃足下驅而致之也夫當荒危之世
取干戈之險內違同盟之誓外失戎狄之心兵興州壤
禍發蕭牆將以定霸不亦難乎前以西山陸梁出兵平
討會麴義餘殘畏誅逃命故遂住大軍分兵撲蕩此兵
孤之前行乃界橋塞旗拔壘先登制敵者也始聞足下

鑄金紵紫命以元帥謂當因茲奮發以報益明之恥是
故戰夫引領竦望旌旆惟遂含光匿影寂爾無聞卒臻
屠滅相為惜之夫有平天下之怒希長世之功權御師
徒帶養戎馬叛者無討服者不收威懷並喪何以立名
今舊京克復天罔云補罪人斯亡忠幹翼化華夏儼然
望於穆之作將戢干戈放散牛馬足下獨何守區區之
土保軍內之廣甘惡名以速朽亡令德之久長壯而籌
之非良策也宜釋憾除嫌敦我舊好若斯言之玷皇天

是聞

更公孫瓊與子書

瓊夢薊城崩知必敗乃開使與子
續書紹侯者得之使陳琳更其書

蓋聞在昔衰周之世僵尸流血以為不然豈意今日身
當其衝袁氏之攻似若神鬼鼓角鳴於地中梯衝舞吾
樓上日窮月踧無所聊賴汝當碎首於張燕速致輕騎
到者當起烽火於北吾當從內出不然吾亡之後天下
雖廣汝欲求安足之地其可得乎

為曹洪與世子書

十一月五日洪白前初破賊情侈意奢說事頗過其實得九月二十日書讀之喜笑把翫無厭亦欲令陳琳作報琳頃多事不能得為念欲遠以為懼故自竭老夫之思辭多不可一二粗舉大綱以當談笑漢中地形實有險固四嶽三塗皆不及也彼有精甲數萬臨高守要一夫揮戟萬人不得進而我軍過之若駭鯨之決細網奔兒之觸魯縞未足以喻其易雖云王者之師有征無戰

不義而彊古人常有故唐虞之世蠻夷猾夏周宣之盛亦讎大邦詩書歎載言其難也斯皆憑阻恃遠故使其然是以察茲地勢謂為中材處之殆難倉卒來命陳彼妖惑之罪序王師曠蕩之德豈不信然夏殷所以喪苗扈所以斃我之所以克彼之所以敗也不然商周何以不敵哉昔鬼方蠶昧崇虎讒凶殷辛暴虐三者皆下科也然高宗有三年之征文王有退修之軍盟津有再駕之役然後殞戎勝殷有此武功焉未有星流景集飈

奮霆擊長驅山河朝至暮捷若今者也由此觀之彼固
不逮下愚則中才之守不然明矣在中才則謂不然而
來示乃以為彼之惡稔雖有孫田墨鼂猶無所救竊又
疑焉何者古之用兵敵國雖亂尚有賢人則不伐也是
故三仁未去武王還師宮奇在虞晉不加戎季梁猶在
彊楚挫謀暨一至衆賢奔紂三國為墟明其無道有人猶
可救也且夫墨子之守縈帶為垣高不可登折箸為械
堅不可入若乃距陽平據石門據八陣之列騁奔牛之

權焉肯土崩魚爛哉設令守無巧拙皆可攀附則公輸
已陵宋城樂毅已拔即墨矣墨翟之術何稱田單之智
何貴老夫不敏未之前聞蓋聞過高唐者效王豹之謳
游濉漁者學藻縹之綵閒自入益部仰司馬揚王之遺
風有子勝斐然之志故頗奮文辭異於他日恆乃輕其
家丘謂為倩人是何言歟夫驥驥垂耳於坰牧鴻雀戢
翼於汙池袞之者固以為園囿之凡鳥外廄之下乘也
及其整蘭筋揮勁翮陵厲清浮顧盼千里豈可謂其倩

翰於晨風假足於六駿哉恐猶未信丘言必大噱也洪

白

文帝序曰上平定漢中族父都護還書與余盛稱彼方土地形勢觀其辭如陳琳所叙為也

荅張紘書

紘見楠榴枕愛其文為作賦時琳在北見之以示人曰此吾鄉張子綱所作也後紘見琳作武軍賦應機論與琳

書深歎美之琳乃答

自僕在河北與天下隔此間率少於文章易為雄伯故使僕受此過差之譚非其實也今景興在此足下與子布在彼所謂小巫見大巫神氣盡矣

牋

荅東阿王牋

琳死罪死罪昨加恩辱命并示龜賦披覽粲然君侯體
高俗之材秉青萍干將之器荆鐘無聲應機立斷此乃
天然異稟非鑽仰者所庶幾也音義既遠清辭妙句簇
絕煥炳譬猶飛兔流星超山越海龍驥所不敢追況於
駕馬可得齊足哉夫聽白雪之音觀綠水之節然後東
野巴人蚩鄙益著載歡載笑欲罷不能謹韜犢玩耽以

為吟頌琳死罪死罪

檄

為袁紹檄豫州文

左將軍領豫州刺史郡國相守益聞明主圖危以制變
忠臣慮難以立權是以有非常之人然後有非常之事
有非常之事然後能立非常之功夫非常者固非常人
所擬也曩者彊秦弱主趙高執柄專制朝權威福由已
時人迫脅莫敢正言終有望夷之敗祖宗焚滅汚辱至

今永為世鑒及臻呂后季年產祿專政內兼二軍外統
梁趙擅斷萬機決事省禁下陵上替海內寒心於是絳
侯朱虛興兵奮怒誅夷逆暴尊立太宗故能道化興隆
光明顯融此則大臣立權之明表也司空曹操祖父中
常侍騰與左悗徐璜並作妖孽饕餮放橫傷化虐民父
嵩乞匄擣養因贓假位輿金輦璧輸貨權門竊盜鼎司
傾覆重器操贅闔遺醜本無懿德標狡鋒協好亂樂禍
幕府董綽鷹揚掃除凶逆續遇董卓侵官暴國於是提

劦揮鼓發命東夏收羅英雄棄瑕取用故遂與操同諮
合謀授以裨師謂其鷹犬之才爪牙可任至乃愚佻短
畧輕進易退傷夷折劦數喪師徒幕府輒復分兵命銳
修完補輯表行東郡領兗州刺史被以虎文獎贊威柄
冀獲秦師一尅之報而操遂乘資跋扈肆行凶忒割剝
元元殘賢害善故九江太守邊讓英才俊偉天下知名
直言正色論不阿諂身首被梟懸之誅妻孥受灰滅之
咎自是士林憤痛民怨彌重一夫奮臂舉州同聲故躬

破於徐方地奪於呂布彷徨東裔蹈據無所幕府推彊
幹弱枝之義且不登叛人之黨故復援旌擐甲席卷赴
征金鼓響震布衆奔沮拯其死亡之患復其方伯之位
則幕府無德於充土之民而有大造于操也後會鸞駕
反旆羣虜寇攻時冀州方有北鄙之警匪遑離局故使
從事中郎徐勛就發遣操使繕修郊廟翊衛幼主操便
放志專行脅遷當御省禁卑侮王室敗法亂紀坐領三
臺專制朝政爵賞由心刑戮在口所愛光五宗所惡滅

三族羣談者受顯誅腹議者蒙隱戮百寮鉗口道路以
目尚書紀朝會公卿克員品而已故太尉楊彪典歷二
司享國極位操因緣眦睚被以非罪榜楚參并五毒備
至觸情任忒不顧憲綱又議郎趙彥忠諫直言義有可
納是以聖朝含聽改容加錫操欲迷奪明時杜絕言路
擅收立殺不俟報聞又梁孝王先帝母昆墳陵尊顯桑
梓松栢猶宜肅恭而操帥將校吏士親臨發掘破棺裸
尸掠取金寶至今聖朝流涕士民傷懷操又特置發丘

中郎將摸金校尉所過隳突無骸不露身處三公之位而行桀虜之態汙國虐民毒施人鬼加其細政慘苛科防互設縉綈充蹊坑穿塞路舉手挂網羅動足觸機陷是以充豫有無聊之民帝都有吁嗟之怨歷觀載籍無道之臣貪殘酷烈於操為甚幕府方詰外奸未及整訓加緒含容冀可彌縫而操豺狼野心潛包禍謀乃欲摧撓棟梁孤弱漢室除滅忠正專為梟雄往者伐鼓北征公孫瓚彊寇桀逆拒圍一年操因其未破陰交書命外

助王師內相掩襲故引兵造河方舟北濟會其行人發
露瓊亦梟夷故使鋒芒挫縮厥圖不果爾乃大軍過蕩
西山屠各左校皆束首奉質爭為前登大羊殘醜消淪
山谷於是操師震懼晨夜逋遁屯據教倉阻河為固欲
以螳螂之斧禦隆車之隧幕府奉漢威靈折衝宇宙長
戟百萬胡騎千羣奮中黃育獲之士騁良弓勁弩之勢
并州越太行青州涉濟漂大軍汎黃河而角其前荊州
下宛葉而掎其後雷震虎步並集虜庭若舉炎火以炳

飛蓬覆滄海以沃熛炭有何不滅者哉又操軍吏士其可戰者皆自幽冀或故營部曲或怨曠思歸流涕北顧其餘充豫之民及呂布張揚之遺衆覆亡迫脅權時苟從各被創夷人為讎敵若迴旆方徂登高岡而擊鼓吹揚素揮以啟降路必土崩瓦解不俟血刃方今漢室陵遲綱維弛絕聖朝無一介之輔股肱無折衝之勢方畿之內簡練之臣皆垂頭搃翼莫所憑恃雖有忠義之佐脅於暴虐之臣焉能展其節又操持部曲精兵七百圍

守宮闈外託宿衛內實拘執懼其篡逆之萌因斯而作
此乃忠臣肝腦塗地之秋烈士立功之會可不勗哉操
又矯命稱制遣使發兵恐邊遠州郡過聽而給與彊寇
弱主違衆旅叛舉以喪名為天下笑則明哲不取也即
日幽并青冀四州並進書到荊州便勒見兵與建忠將
軍協同聲勢州郡各整戎馬羅落境界舉師揚威並匡
社稷則非常之功於是乎著其得操首者封五千戶侯
賞錢五千萬部曲偏裨將校諸吏降者勿有所問廣宣

恩信班揚符賞布告天下咸使知聖朝有拘幅之難如
律令

檄吳將校部曲文

年月朔日子尚書令或告江東諸將校部曲及孫權宗
親中外蓋聞禍福無門惟人所召夫見幾而作不處凶
危上聖之明也臨事制變因而能通智者之慮也漸潰
荒沈往而不返愚者之蔽也是以大雅君子居安思危
以遠咎悔小人臨禍懷佚以待死亡二者之量不亦殊

平孫權小子未辨菽麥要領不足以膏齊斧名字不足以
以洿簡墨璧猶殼卵始生翰毛而便陸梁放肆顧行吠
主謂為舟楫足以距皇威江湖可以逃靈誅不知天網
設張以在綱目釀鑊之魚期於消爛也若使水而可恃
則洞庭無三苗之墟子陽無荆門之敗朝鮮之壘不刊
南越之旌不拔昔夫差承闔閭之遠跡用申胥之訓兵
棲越會稽可謂彊矣及其抗衡上國與晉爭長都城屠
於勾踐武卒散於黃池終於覆滅身罄越軍及吳王濞

驕恣屈彊猖狂始亂自以兵強國富勢凌京城太尉帥
師甫下滎陽則七國之軍瓦解冰泮潯之罵言未絕於
口而丹徒之刃以陷其胸何則天威不可當而悖逆之
罪重也且江湖之衆不可恃也自董卓作亂以迄於今
將三十載其間豪傑縱橫熊據虎跱彊如二袁勇如呂
布跨州連郡有威有名十有餘輩其餘鋒悍特起鷙視
狼顧爭為梟雄者不可勝數然皆伏鈇嬰鉞首腰分離
雲散原燎罔有子遺近者關中諸將復相合聚續為叛

亂阻二華據河渭驅率羌胡齊鋒東向氣高志遠似若
無敵丞相秉鉞鷹揚順風烈火元戎啟行未鼓而破伏
尸千萬流血漂櫓此皆天下所共知也是後大軍所以
臨江而不濟者以韓約馬超逋逸逆脫走還涼州復欲
鳴吠逆賊宋建僭號河首同惡相救並為脣齒又鎮南
將軍張魯負固不恭皆我王誅所當先加故且觀兵旋
旆復整六師長驅西征致天下誅偏將涉隴則建約梟
夷於首萬里軍入散關則羣氐率服王侯帥奔走前

驅進臨漢中則陽平不守十萬之師土崩魚爛張魯逋竄走入巴中懷恩恆過委質還降巴夷王朴胡賓邑侯杜濩各帥種落共舉巴郡以奉王職鉢鼓一動二方俱定利盡西海兵不鈍鋒若此之事皆上天威明社稷神武非徒人力所能立也聖朝寬仁覆載允信允文大啟爵命以示四方魯及胡濩皆享萬戶之封魯之五子各受千室之邑胡濩子弟部曲將校為列侯將軍以下千有餘人百姓安堵四民反業而建約支屬皆為鯨鯢超

之妻孥焚首金城父母嬰孩覆尸許市非國家鍾禍於
彼降福於此也逆順之分不得不不然夫擊鳥先高攫鷺
之勢也牧野之威孟津之退也今者枳棘翦羽扞戎夏以
清萬里肅齊六師無事故大舉天師百萬之衆與匈奴
南單于呼完厨及六郡烏桓丁令屠各湟中羌僰霆奮
席卷自壽春而南又使征西將軍夏侯淵等率精甲五
萬及武都氐羌巴漢銳卒南臨汶江搘據庸蜀江夏襄陽
諸軍橫截湘沅以臨豫章樓船橫海之師直指吳會萬

里尅期五道並入權之期命於是至矣丞相銜奉國威
為人除害元惡大憝必當梟夷至於枝附葉從皆非詔
書所特禽疾故每破滅彊敵未嘗不務在先降後誅拔
將取才各盡其用是以立功之士莫不翹足引領望風
響應昔袁術僭逆王誅將加則廬江太守劉勲先舉其
郡還歸國家呂布作亂師臨下邳張遼侯成率衆出降
還討眭固薛洪穆尚開城就化官渡之後則張邵高奐
舉事立功後討袁尚則都督將軍馬延故豫州刺史陰

夔射聲校尉郭昭臨陣來降圍守鄴城則將軍蘇游反
為內應審配兄子開門入兵既誅袁譚則幽州大將焦
觸攻逐袁熙舉縣來服凡此之輩數百人皆忠壯果烈
有智有仁悉與丞相參圖畫策折衝討難芟敵搴旗靜
安海內豈輕舉措也哉誠乃天啟其心計深慮遠審邪
正之津明可否之分勇不虛死節不苟立屈伸變化惟
道所存故乃建丘山之功享不訾之祿朝為讎虜夕為
上將所謂臨難知變轉禍為福者也若夫說誘甘言懷

寶小惠泥滯苟且沒而不覺隨波漂流與嫖俱滅者亦甚衆多吉凶得失豈不哀哉昔歲軍在漢中東西懸隔合肥遺守不滿五千權親以數萬之衆破敗奔走今乃欲當禦雷霆難以冀矣夫天道助順人道助信事上之謂義親親之謂仁盛孝章君也而權誅之孫輔兄也而權殺之賊義殘仁莫斯為甚乃神靈之逋罪下民所同讎辜讎之人謂之凶賊是故伊摯去夏不為傷德飛廉死紂不可謂賢何者去就之道各有宜也丞相深惟江

東舊德名臣多在載籍近魏叔英秀出高峙著名海內
虞文繡砥礪清節耽學好古周泰明當世雋彥德行修
明皆宜膺受多福保乂子孫而周盛門戶無辜被戮遺
類流離湮沒林莽言之可為愴然聞魏周榮虞仲翔各
紹堂構能負析薪及吳諸顧陸舊族長者世有高位當
報漢德顯祖揚名又諸將校孫權婚親皆我國家良寶
利器而並見驅逐雨絕於天有斧無柯何以自濟相隨
顛沒不亦哀乎蓋鳳鳴高岡以遠羈羅賢聖之德也鶴

鴟之鳥巢於葦苕苕折子破下愚之惑也今江東之地無異葦苕諸賢處之信亦危矣聖朝開弘曠蕩重惜民命誅在一人與衆無忌故設非常之賞以待非常之功乃霸夫烈士奮命之良時也可不勉乎若能翻然大舉建立元勲以膺顯祿福之上也如其未能筭量大小以存易亡亦其次也夫繫蹄在足則猛虎絕其蹯蝮蛇在手則壯士斷其節何則以其所全者重所棄者輕若乃樂禍懷寧迷而忘復闇大雅之所保背先賢之去就忽

朝陽之安甘折苦之末日忘一日以至覆沒大兵一放
王石俱碎雖欲救之亦無及已故令往購募爵祿科條
如左檄到詳思至言如詔律令

版文

為袁紹拜烏丸三王為單于版文

遼西烏丸大人丘力居上谷烏丸大人難樓各稱王而遼東屬國烏丸大人蘇僕延自稱
靖王右北平烏丸大人烏延自稱汗魯王後丘力居死從子蹋頓代立總攝二王袁紹與
公孫瓚連戰蹋頓助紹擊瓚破之紹矯制
賜蹋頓難峭王汗魯王印綬皆為單于

使持節大將軍督幽青并領冀州牧阮鄉侯紹承制詔
遼東屬國率衆王領下烏丸遼西率衆王蹋頓右北平
率衆王汗盧維乃祖慕義遷善欵塞內附北捍玁狁東
拒歲貊世守北陲為百姓保鄣雖時侵犯王畧命將徂
征厥罪率不旋時悔愆變改方之外夷最又聰慧者也
始有千夫長百夫長以相統領用能悉乃心克有勲力
於國家稍受王侯之命自我王室多故公孫瓊作難殘
夷厥土之君以侮天慢王是以四海之內並執干戈以

衛社稷三王奮氣裔土忿奸憂國控弦與漢兵為表裏
誠甚忠孝朝所嘉焉然而虎兕長蛇相隨塞路王官爵
命否而無聞夫有勲不賞俾勤者怠今遣行謁者楊林
齋單于璽綬車服以對爾勞其各綏靜部落教以謹慎
無使作凶作慝世復爾祀位長為百蠻長厥有咎有不
臧者泯於爾祿而喪於乃庸可不勉乎

設難

應譏

客有譏余者云聞君子動作周旋無所苟而已矣今主君鍾陰陽之美總賢聖之風固非世人所能及遭豺狼肆虐社稷隕傾既不能抗節服義與主存亡而背枉違難耀茲武功徒獨震撲山東剝落元元結疑本朝假拒羣奸使已蒙尊沓之謗而他人受討賊之勲捐功棄力以德取怨今賤文德而貴武勇任權謫而背舊章無乃非至德之純美而有闕於後人哉主人曰是何言也夫兵之設亦久矣所以威不軌而懲淫慝也夫申鳴違父

樂羊食子季友鳩兄周公戮弟猶忍而行之王事所不得已也而況將避讒慝之嫌棄社稷之難愛暫勞之民忘永康之樂此庸夫猶所不為何有冠世之士哉昔洪水滔天汎濫中國伯禹躬之過門而不入率萬方之民致力乎溝洫乃至簫韶九成百戰率舞垂拱無為而天下宴如夫豈前好勤而後媿樂乎蓋以彼勞求斯逸也夫世治責人以禮世亂則考人以功斯各一時之宜故有論戰陣之權於清廟之堂者狂矣陳俎豆之器於城

漢之墟者則悖矣是以達人君子必相時以立功必揆宜以處事孝靈既喪嫉官放禍棟臣殘酷宮室焚火君乃芟凶族夷惡醜蕩滌朝奸清澄守職也既乃卓為封蛇幽鴟帝后強以暴國非力所討違而去之宜也是故天賛人和無思不至用能合師百萬若運諸掌者義也今人主以寬弘為宇仁義為廬若地之載如天之燾故當其聞管籥之聲則恐民之病也見羽毛之美則懼士之勞也察稼穡之不時則推民之匱也臨臺觀之崇

高則恤役之病也是以虛心恭已取人之謨闢四門廣
諫路貴讜言賤巧僞慮不專行功不擅美咨事若不及
求讐恐不聞用能使賢智者盡其策勇敢者竭其身故
舉無遺闕而風烈宿宣也

樂府

飲馬長城窟行

樂府瑟調曲

飲馬長城窟水寒傷馬骨往謂長城吏慎莫稽留太原
卒官作自有程舉築詣汝聲男兒寧當格鬪死何能怫

鬱築長城長城何連連連連三千里邊城多健少內舍
多寡婦作書與內舍便嫁莫留住善侍新姑嫜時時念
我故夫子報書往邊地君今出語一何鄙身在禍難中
何為稽留他家子生男慎莫舉生女哺用脯君獨不見
長城下死人骸骨相撐柱結髮行事君慊慊心意闊明
知邊地苦賤妾何能久自全少玉臺作兒往一
作與闕一作間

詩

遊覽二首

高會時不娛羈客難為心殷懷從中發悲感激清音投
觴罷歡坐逍遙步長林肅肅山谷風默默天路陰惆悵
忘旋反歎欷涕沾襟默默一作默

點襟一作巾

其二

節運時氣舒秋風涼且清閒居心不娛駕言從友生翶
翔戲長流逍遙登高城東望看疇野迴顧覽園庭嘉木
凋綠葉芳草纖紅榮騁哉日月逝年命將西傾建功不
及時鐘鼎何所銘收念還房寢慷慨詠墳經庶幾及君

在立德垂功名

宴會

凱風飄陰雲白日揚素暉良友招我遊高會宴申闡元

鶴浮清泉綺樹煥青蕤

後闕

漢魏六朝百三家集卷二十八